

**Ni Presidente
Dieter F. Uchtdorf**

Maikadua a Mammagbaga
iti Umuna a Pangluen



Amatayo, Mannursurotayo

Napadasanyo kadin ti nanglukat iti maysa a kahon a naglaon kadagiti nadumaduma a partes, inruaryo dagiti annuroten iti panangbukel, ken panunoteny, “Awan kaes-eskanna daytoy?”

No dadduma, iti baet dagiti kasayaatan a panggep ken kompiansa iti kaunggan, mangiruartayo iti maysa a parte ket saludsoden, “Para iti ania dayta?” wenko “Kasano nga umsek dayta?”

Umad-adda ti pannakapaaytayo no makitatayo ti kahon ket mabasa ti, “Kasapulan ti panangbukel—agtawen iti 8 ken nasursurok.” Gapu ta awanantayo pay iti pamalpalatpatan, saan a daytoy ti mangpapigsa iti kompiansa wenko panagtalek iti bagitayo.

Maipada daytoy iti padastayo iti ebanghelio no dadduma. No kumitatayo iti maysa a parte daytoy, kudkodentayo ti ulotayo ket panunotentayo no para iti ania dayta a parte. Wenko no amirisentayo ti sabali pay a parte, maammuanta-yo nga uray kalpasan ti panangikarigatantayo nga awaten a nasayaat, ditayo kabaelan a panunoten no apay a mairaman dayta a parte.

Ti Nailangitan nga Amatayo ti Mannursurotayo

Nagasat ti inikkannatay ti Nailangitan nga Amatayo kadagiti nakaskasdaaw nga annuroten para iti panangbukel kadagiti biagtayo ken mangurnos iti kasasayaatan dagiti bagbagitayo. Maaramid dagita nga annuroten ania man ti edadtayo wenko kasasaad. Intedna kadatayo ti ebanghelio ken ti Simbaan ni Jesucristo. Intedna kadatayo ti plano ti pannakasubbot, ti plano ti pannakaisalakan, ken ti plano ti kinaragsak. Dinatayo baybay-an nga agmaymaysa iti amin a parikut wenko pannubok iti biag, nga agkunkuna, “Agpatuloykayo. Naimbag a gasat Panunoteny daytoy.”

No agan-anustayo laeng ken agsapsapultayo nga adda-iti napakumbaba a puso ken nawada a panunot, masarakantayonto nga inikkannatayo ti Dios iti adu a mausar a ramit tapno maawatantayo a nasaysayaat dagiti nalawag nga annurotenna para iti pagragsakantayo iti biag:

- Inikkannatayo iti di magatadan a sagut ti Espiritu Santo, nga addaan iti potensial nga agbalin a personal, nailangitan a mannursurotayo bayat ti panagadaltayo iti balikas ti Dios ken panangpanggep a mangitunos kadagiti panunot ken tignaytayo iti balikasna.
- Inikkannatayo iti ania man nga oras a panangdanon Kenkuana babaen dagiti kararag ti pammati ken araraw nga addan iti pudno a panggep.
- Inikkannatayo kadagiti apostol ken propeta iti agdama a panawen, a mangipalgak iti balikas ti Dios iti panawentayo ken addaan iti awtoridad a mangbegkes wenko manglantip iti daga ken iti langit.
- Insublina ti Simbaanna—ti organisasion dagiti mamati nga agtrabaho a sangkamaysa nga agtitinnulong kabayatan ti panangitrahoda iti pannakaisalakanda nga addaan iti panagbuteng, panagpigenger, ken awan kapadana a rag-o.¹
- Inikkannatayo kadagiti nasantuan a kasuratan—ti naisurat a balikasna kadatayo.
- Inikkannatayo iti nagadu a ramit ti moderno a teknolohia a makatulong kadatayo iti panagbalintayo a disipulo. Adu kadagitoy a nakaskasdaaw a ramit ti masarakan iti LDS.org.

Apay nga inikkannatayo ti Nailangitan nga Amatayo iti kasta unay a kaaduna a tulong? Gapu ta ay-ayatennatayo.

Ken gapu ta, kas iti kinunana maipapan ti Bagina, “Daytoy ti aramidko ken gloriak—mangipatungpal iti saan nga ipapaptay ken agnanayon a biag ti tao.”²

Iti sabali a pannao, Ti Nailangitan nga Ama ti Diostayo, ken ti Dios ti mannursuro kadatayo.

Ammo ti Amatayto iti Langit ti kasapulan dagiti annakna a nasaysayaat ngem iti asino man. Daytoy ti aramidna ken gloria nga agtultuloy a mangtulong kadatayo, nga ik-ikkannatayo kadagiti nakaskasdaaw a banbanag ken naespirituan a pamataudan a mangtulong kadatayo iti dalantayo tapno agsubli Kenkuana.

Tunggal Ama ket Mannursuro

Iti sumagmamano a lugar ti lubong, dagiti amma ket padayawan dagiti familia ken kagimongan iti bulan ti Hunio. Kanayon a nasayaat a dayawen ken respetarentayo dagiti nagannak kadatayo. Agaramid dagiti amma iti adu a nasasayaat a banag para iti familiada ken addaanda iti adu a madaydayaw a kababalin. Dua kadagiti kapatgan nga akem dagiti amma iti biagda kadagiti annakda ket ti panagbalinda a nasayaat a pagwadan ken mannursuro. Ad-adu pay ti maaramid dagiti amma ngem iti mangibaga kadagiti annakda no ania ti umno wenno biddut; ad-adu pay ti maaramidda ngem iti mangted ti pagbasaan kada-kuada ket namnamaem ida no ania ti panangkunada iti biag para kadakuada.

Sursuruan dagiti amma dagiti napapateg nga annakda ket ipakitada babaen ti nasayaat a pagwadanda ti wagas a pakapagbiagan iti napudno a panagbiag. Saan a panawan dagiti amma dagiti annakda nga agmaymaysa ngem sidadaan a saranayenda ida, tunglunda ida a tumakder no maitibkolda, tumultulongda kadakuada a mangparmek kadagiti rigat a masarangetda. Ken no dadduma, nainsiriban a lungalong nga, ipalubos dagiti amma nga agrigat dagiti annakda, ta maamirisa a mabalin a daytoy ti kasayaatan a wagas tapno makasursuroda.

Mannursurotayo Amin

Idinto nga aramiden daytoy dagiti amma ditoy a daga para kadagiti bukodda nga annak, ti panangisuro ket maysa a banag a nasken nga idiayatayo it amin nga annak ti Dios, ania man ti edad, lugar, wenno kasasaad. Laglagipen, annak ti Dios dagiti kakabsattayo. Kamengtayo amin ti maymaysa nga agnanayon a familia.

Babaen iti daytoy nasken nga agbalintayo amin a mannursuro a sigagagar a dumanon ken tumulong iti maysa

ken maysa tapno mapagbalintayo amin ti bagbagitayo a kasasayaatan. Gapu ta annaknatayo ti Dios, addaantayo iti potensial nga agbalin a kas Kenkuana. Panagayat iti Dios ken kadagiti padatayo a tao, panagtungpal kadagiti bilin ti Dios, ken panangsuot iti pagwadan ni Cristo ket isu dagitoy ti nalinteg, akikid, ken narag-o a dalan nga agsubli iti sidong dagiti nailangitan a nagannak.

No ipatpategnatayo unay ti Dios ti sangkatawan, gapu ta Isu ti mangisuro kadatayo, nalabit a mabalintayo met a tulongan dagiti padatayo a tao, ania man ti maris ti kudilda, ken kasasaada iti panagbiag, pagsasao, wenno relihion. Agbalintayo koma a naparegta a mannursuro ken mangbendision iti biag dagiti dadduma—saan laeng a dagiti bukodtayo nga annak no di ketdi pay ti amin nga annak ti Dios iti intero a lubong.

DAGITI NAGADAWAN

1. Dagiti Aramid 13:52; Taga Filipos 2:12.
2. Moises 1:39.

PANANGISURO MANIPUD ITI DAYTOY A MENSAHE

Mabalin a kayatmo nga irugi babaen ti panangkiddaw kadagiti sursuruam a panunotenda ti maysa a kanito idi insuro ida ti Nailangitan nga Ama. Mabalimo a kiddawen kadakuada a mangpanunot kadagiti pagpadaan dayta a kanito ken ti kanito idi nariknada nga insuro ida di amada iti rabaw ti daga. Awisem ida a mangisurat kadagiti pagpadaan iti no kasano a nasursuruanda. Mabalin a karitem ida a mangpadas a mangtulad iti banag nga insuratda iti panagkagumaan nga agbalin a nasaysayaat a pagwadan kadagiti dadduma.

ANNAK

Tulong ti Nailangitan nga Ama

Gapu ta ay-ayatennatayo ti Nailangitan nga Ama, inikkannatayo iti adu a ramit, wenno sagut, a makatulong kadatayo. Iti baba dagiti sumagmamano kadagiti sagut nga intedna kadatayo. Kasano a mausaryo dagitoy a sagut a mangbendision kadagiti dadduma?

bileg ti priesthood
kararag

ayat para kadagiti dadduma
dagiti apostol ken propeta
dagiti nasantuan a kasuratan



Pammati, Pamilia, Tulong

Dagiti Ordinansa ken Katulagan iti Templo

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawat iti “Ti Kaamaan: Maysa a Waragawag iti Lubong” ket mangpadakkel iti pammatiyo iti Dios ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Amin nga ordinansa a kasapulan para iti pannakaisalakan ken pannakaintan-ok ket kaduaen dagiti katulagan iti Dios. “Ti panagaramid ken panagtungpal kadagiti katulagan ket kayatna a sawen a panagpili a mangibegkes iti bagbagitayo iti Amatayo iti Langit ken ni Jesucristo,” kinuna ni Linda K. Burton, Relief Society general president.¹

Kinuna ni Elder Neil L. Andersen ti Korum dagiti Sangapulo-ket-dua nga Apostol, “Kinuna ti Apo, ‘Kadagiti ordinansa . . . maiparangarang ti bileg ti kinadios.’

“Adda dagiti naisangsangayan a bendision manipud iti Dios para iti tunggal maikari a tao a nabuniagan, umawat iti Espiritu Santo, ken kananon a makiranud iti sakramento.”²

“No mapan iti templo dagiti lallaki ken babbai,” kinuna ni Elder M. Russell Ballard ti Korum dagiti Sangapulo-ket-dua nga Apostoi, “agpadada a naisagutan iti maymaysa a bileg, a daytoy ti bileg ti priesthood . . .

“ . . . Amin a lallaki ken amin a babbai ket makaala iti daytoy a bileg para iti tulong iti panagbiagda. Amin a nagaramid kadagiti sagrado a katulagan iti Apo ken mangdayaw kadagitia a katulagan ket maikari

nga umawat iti personal a paltiing, tapno mabendisionan iti panagserberbi dagiti anghel, tapno makisarita iti Dios, tapno umawat ti pakabulkan ti ebanghelio, ken, kangrunaana, tapno agbalin nga agtawid kas ken ni Jesucristo iti amin nga adda iti Amatayo.”³

Dagiti Mainayon a Nasantuan a Kasuratan

1 Nephi 14:14; Doktrina ken Katulagan 25:13; 97:8; 109:22

Dagiti Estoria ti Tattao a Sibibiag Pay

Idi 2007, uppat nga aldaw kalpasan ti dakkel a ginggined iti Peru, naam-ammo ni Elder Marcus B. Nash ti Seventy ti branch president Wenceslao Conde ken ti asawana, ni Pamela. “Sinaludsod ni Elder Nash ken ni Sister Conde no komusta dagiti babassit nga annakna. Siiisem nga insungbatna a babaen ti kinaimbag ti Dios natalged ken nasayaatda. Kinomustana ti pagtaengan dagiti Conde.

“‘Awanen,’ gagangay a kinunana. “ . . . ’Ngem,’ nadlaw ni Elder Nash, ‘umis-isemka bayat ti panagsaritata.’ “‘Wen,’ kinunana, ‘nagkararagak ket naaddaanak iti kappia. Adda

kadakami ti amin a kasapulanmi. Adda kadakami iti tunggal maysa, adda kadakami dagiti annakmi, nailantipkami iti templo, addaankami iti nakaskasdaaw a Simbaan, ken adda kadakami ti Apo. Makaibangonkami manen iti tulong ti Apo.’ . . .

“Ania ti maipapan iti panagaramid ken panagtungpal kadagiti katulagan iti Dios a mangted kadatayo iti bileg nga umisem iti baet dagiti rigrigat, tapno mapagbalin a balligi ti panagrigat . . . ?”

“Ti Dios ti pagtaudan. Ti panangalami iti dayta a bileg ket babaen dagiti katulagan Kenkuana.”⁴

DAGITI NAGADAWAN

1. Linda K. Burton, “The Power, Joy, and Love of Covenant Keeping,” *Liahona*, Nob. 2013, 111.
2. Neil L. Andersen, “Power in the Priesthood,” *Liahona*, Nob. 2013, 92.
3. M. Russell Ballard, “Men and Women in the Work of the Lord,” *Liahona*, Abr. 2014, 48–49.
4. Kitaen iti D. Todd Christofferson, “The Power of Covenants,” *Liahona*, Mayo 2009, 19, 20–21.

Ibilang Daytoy

Kasano a mapapigsa ken mapabilegnatayo dagiti ordinansa ken katulagan iti templo?